

SOLENIIDADE S. PEDRO NO S. PAULO – TINAN A

Tema

Tinan ne'e, Domingu da-13 Tempu Komún nian koinside ho Solenidade apóstolu S. Pedro no S. Paulo nian. Liturjia konvida ita atu reflète kona-ba figura rua ne'e no konsidera sira-nia ezemplu fidelidade ba Jezús Kristu no sasin nian ba Maromak nia projetu libertadór.

Evanjellu konvida dixípulu sira atu adere ba Jezús no simu Nia nu'udar "Mesias. Maromak nia Oan". Husi adezaun ne'e, moris mai Igreja – comunidade dixípulu Jezús nian, ne'ebé konvoka no organiza an hale'u Pedro. Igreja nia misaun mak fó sasin ba proposta salvasaun Jezús lori mai. Ba Igreja no ba Pedro mak Na'i konfia xave sira – katak, interpreta Jezús nia liafuan sira, adapta Jezús nia hanorin ba dezafiu sira mundu nian no simu iha comunidade ema hotu ne'ebé adere ba Jezús.

Leitura dahuluk hatudu oinsá Maromak garante dixípulu sira nia sasin no oinsá nia tau matan ba sira bainhira mundu hewai sira. Iha Maromak nia asaun ba Pedro, Lucas hatudu Maromak nia solisitude ba Igreja no ba ninia dixípulu sira ne'ebé fó sasin iha mundu Liafoun Di'ak salvasaun nian.

Leitura daruak apresenta an nu'udar "testamentu" Paulo nian. Hakerek nu'udar "balansu finál" apóstolu nia moris nian, autór testu ne'e nian, fó hanoin kona-ba Paulo nia resposta jeneroza ba bolun ne'ebé Jezús halo ba nia no ninia kompromisu totál ho Evanjellu. Testu konvida sarani sira husi tempu no fatin hotu atu la'o tuir dalan sarani ho entuziazmu, ho entrega, ho ánimu hanesan Paulo nia ezemplu.

LEITURA I – Apóst 12,1-11

Testu ohin nian taka parte dahuluk Livru Apóstolu sira-nia Hahalok (istória espansaun kristianizmu iha fronteira Palestina nia laran – kf. Após 1-12). Lucas haktuir, iha testu ne'e, persegisaun foun ba Jezús nia Kreda.

Persegisaun ne'e hahalok Erodes Agripa I nian, Erodes Boot nia bei-oan. Imperadór Calígula fó ba nia, iha tina 37 nune'e, territóriu antigu Filipe nian (Itureia, Traconítide, Bataneia, Gaulanítide no Auranítide); iha tinan 40, fó mós ba nia territóriu antigu Erodes Antipas nian (Galileia no Pereia). Liutiha Calígula nia assasíniu, Erodes Agripa serví imperadór Cláudio, ne'ebé oferece ba nia governu Samaria no Judeia nian (tinan 41). Nune'e, Erodes Agripa I ukun Palestina tomak entre tinan 41 no 44. Nia mate derepente iha tinan 44, durante serimónia pública ida.

Erodes Agripa I preokupa atu la ba kontra líder judaiku sira, Nune'e mak nia kuidadu liu atu observa Lei Moisés nia ukun-fuan sira (maski ba razaun política liufali konviksaun). Karik ho objetivu ida-ne'e mak nia buka hanehan "seita kristán" sira, hodi haruka oho Tiago no dadur Pedro.

Tiago ne'ebé ita-nia testu temi mak Zebedeu nia oan, João nia maun. Tiago mak loos duni, pregadór ativu Evanjellu Jezús nian, no membru importante ida comunidade sarani Jerusalém nian. Ho nia mate hodi fakar raan, Tiago "hemu husi káliz hanesan" [Jezús nian], hnesan Jezús rasik fó sai nanis (kf. Mc 10,38). It aiha tinan 42.

Persegisaun ne'e atinje mós, membru seluk comunidade sarani Jerusalém nian. Sira dadur hikas Pedro. Dadus ne'ebé Lucas apresenta – iha testu ohin nian – kona-ba milagre Pedro nia libertasaun labele konsidera nu'udar istóriu ho modu rigorozu; maibé tenke haree liuliu nu'udar katekeze ida kona-ba oinsá Maromak tau matan ba Ninia Igreja no ba dixípulu sira ne'ebé fó sasin salvasaun nian.

MENSAJEN

Iha Livru Apóstolu sira-nia Hahalok, Lucas buka hatudu oinsá Maromak nia planu salvasaun kontinua kumpre, maski Jezús fila hikas ona ba Aman. Jezús nia dixípulu sira mak oras ne'e sai sasin projetu libertasaun Maromak nian iha mundu nia leet.

Testu ohin hakarak esplika oinsá mundu simu Jezús nia dixípulu sira no oinsá Maromak tau matan ba sira ne'ebé fó sasin kona-ba Ninia projetu salvasaun.

1. Elementu istóriku Lucas hato'o kona-ba Tiago nia mate no Pedro nia dadur, iha kontestu persegisaun kontra Igreja durante Erodes Agripa I nia ukun (vers. 1-4), hatudu katak sasin kona-ba Maromak nia projetu libertadór iha mundu hamosu konfrontu ho forsa sira opresaun no mate nian. Ne'e mak realidade ida ne'ebé labele halo dixípulu sira hakfodak, basá Jezús rasik tenke liu husi dalan krús nian. Maibé mundu nia opozisaun labele halo nonook dixípulu sira nia sasin.
2. Enkuantu Pedro iha dadur laran, Igreja harohan ba nia (vers. 5). Indikasaun ne'e hatudu comunidade sarani ida ne'ebé iha uniaun no solidáriu maski dook malu no maski dadur teri netik. Pedro nia libertasaun ne'ebé akontese bainhira Igreja "harohan maka'as ba Maromak ba nia", hatudu oinsá Maromak rona comunidade nia orasaun.
3. Istória furak Pedro nia libertasaun nian (vers. 6-11) hatudu Maromak nia prezensa iha Kreda nia moris no Maromak nia solisitude ba sira ne'ebé fó sasin kona-ba Ninia projetu salvasaun iha ema sira nia leet. Maromak horik hamutuk ho apóstolu sira no, iha mundu nia opozisaun nia oin, Maromak garante autenticidade kona-ba proposta ne'ebé sira apresenta ba mundu.

LEITURA II – 2 Timóteo 4,6-8.17-18

Timóteo destinatáriu surat ne'e nian mak sarani ida moris iha Listra (Ázia Menór), aman gregu no inan judeu-sarani. Nia sai Paulo nia maluk iha misaun; ba nia mak Paulo konfia misaun importante no enkarrega responsabilidade pastorál Igreja sira Ázia Menór nian. Tuir tradisaun, nia mak bispu dahuluk comunidade sarani Éfeso nian.

Ita duvida katak Paulo mak autór surat ne'e nian: surat ne'e nia linguajen, estilu no doutrina apresenta diferenca ho surat seluk Paulo nian; aleinde ne'e, kontestu ekleziál surat ne'e nian mak sékulu I nia rohan eh sékulu II nia inísiu, la'ós Paulo nia época nian (problema iha tempu ne'e la'ós haklaken Evanjellu, maibé metin iha fiar, hasoru mestre falsu sira ne'ebé infiltra an iha comunidade no hanorin doutrina laloos).

Maski nune'e, ema ne'ebé hakerek surat ne'e, refere ba Paulo nia vida nu'udar vida nakonu ho domin ba Kristu no Ninia Evanjellu. Tempu ne'ebá tempu persegisaun nian, no sarani sira hahú lakon entuziazmu... Hodi fó hanoin kona-ba Paulo nia ezemplu, autór hakarak konvida sarani sira enjerál (no animadór sira comunidade nian ho modu partikulár), atu deskobre hikas entuziazmu ba Jezús no ba Ninia Liafoun Di'ak nia sasin.

MENSAJEN

Paulo nia moris, hahú husi kedas ninia enkontru ho Kristu moris-hi'as iha lurón Damasco nian, mak resposta jeneroza ida ba bolun no kompromisu totál ho Evanjellu. Tanba Kristu no tan Evanjellu, Paulo luta, terus, gasta no hamohu nia moris, iha don totál, atu Maromak nia salvasaun to'o ba povu hotu rai nian. Iha nia moris nia rohan, nia sente nia an nu'udar atleta ida ne'ebé luta atu manán no kontente ho ninia prestasaun. Oras ne'e buat ne'ebé nia hein mak koroa glória nian, rezerva ba atleta sira ne'ebé manán (no Paulo hatene katak la'ós de'it ba nia, maibé mós ba sira hotu ne'ebé luta ho entuziazmu hanesan ba "Reinu").

Tuir autór surat ne'e nian, Paulo uza ilas ida atu define nia moris nu'udar don totál ba Maromak no maun-alin sira: ilas vítima ne'ebé oferese an nu'udar sakrifísiu. Paulo halo nia moris don totál ida, atu serví Evanjellu: ninia saran an mak sakrifísiu ida ba Maromak. Atu ninia sakrifísiu sai totál, nia hein de'it atu saran an ho presente ninia raan ne'ebé sei suli nu'udar oferta "libasaun" nian (libasaun mak tua ne'ebé fakar iha altár leten molok hasae vítima sakrifísiu nian).

Iha maneira rua atu fó moris tan Kristu: ida mak hamohu/gasta moris ne'e nia loron ba loron iha knaar atu lori Kristu nia libertasaun ba povu hotu rai nian; ida fali mak fakar raan, dala ida ba nafatin tanba fiar no tanba sasin Kristu nian... Paulo moris modalidade rua hotu; banati tuir Paulo mak dezafiu ida autór Surat ba Timóteo halo ba dixípulu sira ninia tempu nian no tempu hotu nian.

Iha parte daruak ita-nia testu nian (vers. 16-18), autór tau iha Paulo niaibun halerik deziluzau nian, husi ema ida ne'ebé kole no, maski oferese nia moris tomak ba maun-alin sira, ikusmai, nia sente mesak, moris iha abandonu no solidaun... Maibé Paulo konxiente katak Maromak hamutuk ho nia iha nia moris tomak, haraik ba nia kbiit atu enfrenta difikuldade sira, hasai nia husi aat hotu no sei haraik ba nia, iha nia moris nia rohan, vida definitiva. Tan ne'e mak Paulo remata ho hahí: "glória ba Nia

tinan ba tinan. Amen”. Ida-ne’e mak atitude ne’ebé autór surat nian husu ba ninia maun-alin sira: maski iha dezánimu, sofrimentu, terus, buka deskobre Maromak nia prezensa, konfia iha Ninia kbiit, mantein fiél ba Evanjellu: nune’e de’it mak ikusmai sei simu salvasaun definitiva ne’ebé Maromak rezerva ba ema ne’ebé hafunu funu di’ak fiar nian.

EVANJELLU – Mateus 16,13-19

Evanjellu domingu ne’e nian lori ita ba sidade Cesareia Filipe nian (iha zona atuál Banias nian). Sidade ne’e Erodes Filipe mak hari’i (Erodes Boot nia oan) iha tinan 2 eh 3 mK, atu fó onra ba imperadór Augusto.

Epizódium ne’ebé ohin propoin mai ita okupa fatin sentrál ida iha Evanjellu Mateus nian. Epizódium ne’e mosu iha momentu virajen nian, bainhira krús hahú mosu iha Jezús nia oin. Depoizde susesu inisiál iha Ninia ministériu, Jezús experimeta líder sira nia opozisaun no Povu nia dezinterese. Ema la simu Ninia proposta Reinu nian. Grupu ki’ik ida de’it mak simu – grupu dixípulu sira nian.

Nune’e mak Jezús dirije ba dixípulu sira, pergunta ruma kona-ba nia An rasik. La’ós atu sukat ninia popularidade; Nia hakarak, liuliu, atu halo klaru ba dixípulu sira no konfirma sira nia opsauun atu tuir Nia no fó ba sira nia moris ba Reinu.

Mateus nia relatu diferente uitoan de’it husi evanjelista seluk (liuliu Marcos - kf. Mc 8,27-30). Mateus remodela no haluan Marcos nia testu, hodi aumenta afirmasaun katak Jezús mak Maromak nia Oan no mós misaun ne’ebé entrega ba Pedro.

MENSAJEN

Ita-nia testu fahe ba parte rua. Parte dahuluk iha karákteer kristolójiku, nia sentru mak Jezús no definisaun ninia identidade nian. Parte daruak iha karákteer ekleziolójiku, nia sentru mak Igreja, ne’ebé Jezús konvoka hale’u Pedro.

Iha primeira parte (vers. 13-16), Jezús halo pergunta rua ba dixípulu sira: saida mak ema dehan kona-ba Nia no saida mak dixípulu sira hanoin kona-ba Nia.

“Ema sira” nia opiniaun haree Jezús iha kontinuidade ho passadu (“João Baptista”, “Elias”, “Jeremias” eh “profeta ruma”). Sira la kapta Jezús nia kondisaun únika, ninia novidade, ninia orijinalidade. Sira rekoñese de’it katak, Jezús mak ema ida Maromak bolu no haruka ba mundu ho misaun ida – hanesan profeta sira Testamentu Tuan nian... Maibé sira la hakat liu buat ne’e. Iha “ema sira” nia perspetiva, Jezús mak ema di’ak ida, ema justu, jenerozu, ne’ebé rona Maromak nia apelu no esforsa An atu sai sinál moris Maromak nian, hanesan ema seluk molok Nia (vers. 13-14). “Ema sira” hateten buat barak, maibé la sufisiente: signifika katak “ema sira” la komprende Mesias nia novidade, la komprende mós profundidade mistériu Jezús nian.

Dixípulu sira nia opiniaun kona-ba Jezús hakat liu opiniaun komún. Pedro, portavós komunidadade dixípulu sira nian, halo rezume komunidadade Reinu ninia hanoin ho espresaun: “Ita mak Kristu, Maromak moris nia Oan” (vers. 16). Títulu rua haktuir Igreja Mateus nia fiar no katekeze ne’ebé halo kona-ba Jezús. Dehan katak Jezús mak “Kristu” (Mesias) signifika katak nia mak libertadór ne’ebé Israel hein, Maromak haruka atu liberta nia Povu no atu oferese salvasaun definitiva. Ba komunidadade Reinu nian, Jezús la’ós de’it Mesias; nia “Maromak nia Oan” mós. Iha Testamentu Tuan, espresaun “Maromak nia Oan” aplika ba anju sira (kf. Dt 32,8; Sal 29,1; 89,7; Job 1,6), ba Povu eleitu (kf. Ex 4,22; Os 11,1; Jer 3,19), ba membru oioin Maromak nia Povu nian (kf. Dt 14,1-2; Is 1,2; 30,1.9; Jer 3,14) ba liurai (kf. 2 Sm 7,14) no ba Mesias/liurai husi David nia uma-kain (kf. Sal 2,7; 89,27). Ho liafuan ne’e, hakarak dehan ema ida nia kondisaun ne’ebé iha relasaun partikulár ho Maromak, iha ne’ebé Maromak hili no Maromak konfia misaun ida. Defíne Jezús nu’udar “Maromak Oan” signifika, la’ós de’it katak Nia simu Maromak nia moris, maibé katak Nia moris iha komuñauun totál ho Maromak, dezenvolve ho Maromak relasaun ida iha intimidade kle’an no katak Maromak konfia ba Nia misaun únika ba ema sira nia salvasaun; signifika rekoñese unidade no intimidade profunda entre Jezús no Aman no katak Jezús koñese no realiza Aman nia projetu sira iha ema nia leet. Nune’e, dixípulu sira simu konvite atu komprende Maromak nia mistériu.

Iha segunda parte (vers. 17-19), ita iha Jezús nia resposta ba komunidadade dixípulu sira-nia konfisaun fiar nian, ne’ebé apresenta liuhusi Pedro nia lian. Jezús hahú hodi gaba Pedro (katak komunidadade) ba

fiar loos ne'ebé anima nia. Fiar ne'e la'ós Pedro nia méritu, maibé Maromak nia don ida (“la'ós isin no raan mak fó sai ba ó, maibé Ha'u-nia Aman iha lalehan” – vers. 17). Pedro (dixípulu sira) pertense ba kategoria “ema kiak” no “simples” sira nian, nakloke ba Maromak nia novidade, iha fuan disponivel atu simu Maromak nia don no proposta sira (kontráriu ba lider sira – farizeu, doutór Lei, eskriba sira – ne'ebé tuba metin ba sira-nia serteza, seguransa no prekonseitu sira, la hatene loke fuan ba Maromak nia dezafiu sira).

Jezús nia liafuan ba Pedro katak nia mak “fatuk” (naran “Pedro” mak tradusaun grega husi ebraiku “Kephâ” – “fatuk”) iha ne'ebé Kreda sei harii bá. Liafuan ne'e tenke haree iha kontestu konfisaun fiar nian. Mateus hakarak afirma katak baze metin no la nakdoko atu harii Ekklesia Jezús nian mak Pedro nia fiar no comunidade dixípulu sira-nian ne'ebé professa: fiar iha Jezús nu'udar Mesias, Maromak moris nia Oan.

Atu Pedro bele fó sasin katak Jezús mak Mesias Maromak nia Oan no harii comunidade Reinu nian, Jezús promete “xave sira Reinu lalehan nian” no kbiit atu “kesi no atu kore”. Ida-ne'ebé kaer xave sira, iha mundu bíbliku, mak “administradór palásiu nian”... “Administradór palásiu” nian, iha knaar mós atu administra liurai nia soin sira, marka oráriu atu loke no taka palásiu nia odamatan sira no define sé mak bainaka sira atu vizita liurai... Espresaun “kesi no kore”, ba judeu sira iha tempu ne'ebá, signifika kbiit atu interpreta Lei ho autoridade, atu deklara saida mak bele halo, atu hasai eh hatama hikas ema ruma iha comunidade Maromak nia Povu nian. Nune'e, Jezús nomeia Pedro ba “administradór” no supervizór Igreja nian, ho autoridade atu interpreta Jezús nia liafuan sira, atu adapta Jezús nia hanorin sira ba nesesidade no situasuan foun sira, no atu simu eh lae membru foun iha comunidade dixípulu Reinu nian (atensaun: Maromak bolu ema hotu atu integra an iha comunidade Reinu nian; maibé sira ne'ebé la dispostu atu adere ba Jezús nia proposta labele hetan admisaun).

Entaun Jezús konfia ba ema ida (Pedro) primadu ida, papél ida lideransa absoluta nian (xave, kesi no kore) comunidade dixípulu sira nian? Eh Pedro mak ida ne'ebé reprezenta comunidade dixípulu sira nia lian? Difisil atu halo afirmasaun konkluziva no definitiva. Kbiit atu “kesi no kore”, mosu mós iha kontestu seluk, konfia ba comunidade tomak no la'ós ba Pedro de'it (kf. Mt 18,18). Provavelmente, buat ne'ebé konkretu liu mak haree iha Pedro protótipu dixípulu nian; nia reprezenta comunidade ne'ebé halibur hale'u Jezús no haklaken nia fiar iha Jezús nu'udar “Mesias” no “Maromak nia Oan”. Ba comunidade ne'ebé Pedro reprezenta ne'e mak Jezús konfia xave sira Reinu nian no kbiit atu simu no ezklui. Ida ne'e la hasai valór ne'ebé Pedro iha nu'udar figura referénsia nian ba sarani dahuluk sira no dezempeña papél ida importante liu iha animasaun Igreja ne'ebé foin moris, liuliu iha comunidade sira Síria nian (komunidade sira Mateus nia Evanjellu nian).